

**PERTANYAAN-PERTANYAAN
MESYUARAT PERTAMA, PENGGAL KEDUA
PARLIMEN KE 13 – DEWAN RAKYAT.**

PERTANYAAN : **LISAN**
DARIPADA : **Y.B. LIM KIT SIANG
(GELANG PATAH)**
TARIKH : **12 MAC, 2014 (RABU)**
NO SOALAN : **NOMBOR 68**

SOALAN:

YANG BERTHORMAT TUAN LIM KIT SIANG [GELANG PATAH] minta **PERDANA MENTERI** menyatakan samada beliau bersetuju dengan Majlis Perundingan Perpaduan Nasional (NUCC) bahawa Putrajaya perlu bertindak segera apabila berhadapan dengan insiden sensitif perkauman dan agama kerana ketegangan yang meningkat akan menggugat usaha perpaduan Negara dan sebab mengapa berlakunya polarisasi agama yang semakin buruk di dalam Negara.

JAWAPAN :

Tan Sri Yang Di Pertua ;

Kerajaan tidak mengenyepikan sama sekali pandangan atau pendirian dari mana-mana pihak terutama ketika timbulnya isu-isu sensitif yang boleh menjejaskan perhubungan antara kaum yang boleh menggugat dan mengancam keselamatan Negara. Malah kerajaan perlu berhati-hati menangani dan mengurus isu-isu sensitive seperti yang dibangkitkan itu dan telah memilih beberapa pendekatan menyelesaikannya. Antara pendekatan yang dilaksanakan ialah ;

(a) Melalui perbincangan dan perundingan dengan pihak-pihak yang terlibat.

Pendekatan ini merupakan pendekatan terbaik di mana pihak-pihak yang terlibat akan dijemput bagi mendengar pendapat dan pandangan mereka. Dalam masa yang sama berusaha mencari titik pertemuan tindakan yang boleh dipersetujui bersama. Hakikat mesti diakui bahawa perbalahan yang berlaku terutama menyentuh tentang agama, sememangnya amat rumit untuk diselesaikan kerana setiap penganut agama telah mempunyai kepercayaan dan pegangan kukuh terhadap ajaran agama masing-masing.

(b) Penyelesaian melalui dialog.

Pendekatan ini boleh diadakan secara tertutup dimana ia perlu mematuhi panduan-panduan dan etika-etika tertentu. Semua pihak perlu mencari dan berbincang untuk kepentingan bersama dan bukan berbincang untuk menegakkan ajaran agama masing-masing kerana setiap agama itu mempunyai ajaran yang sememangnya berbeza dan tidak akan menemui apa-apa titik persamaan.

(c) Sokongan Pemimpin, Masyarakat dan Media.

Semua pihak perlu menyokong apa jua usaha penyelesaian yang dijalankan samada usaha itu dilakukan oleh Kerajaan atau badan-badan lain termasuk pemimpin dipelbagai peringkat dan juga masyarakat. Media pula perlu turut memainkan peranan yang konstruktif dan tidak menyiarkan berita atau pendapat berbentuk provokasi yang boleh menimbulkan ketegangan.

Isu-isu sensitive termasuk isu-isu yang dikaitkan dengan polarisasi yang berbangkit dari masa kesemasa itu boleh diselesaikan jika semua pihak sedar dan faham tentang kemajmukan dan kepelbagaian sosio-budaya yang memang sedia ujud di Negara ini. Perbezaan-perbezaan yang ada tidak seharusnya dijadikan penghalang

didalam menyelesaikan isu berbangkit sebaliknya perbezaan itu perlu dilihat dari sudut atau perspektif yang boleh memberi faedah dan menjadi asset Negara. Pemimpin-pemimpoin politik tanpa mengira aliran pemikiran pula sewajarnya menjadi pemandu dan contoh kepada kumpulan atau kelompok masing-masing dan bukan mengambil kesempatan untuk mendapat sokongan demi mencapai agenda-agenda tertentu. Isu-isu yang boleh menjejaskan keselamatan Negara, sewajarnya dijadikan isu yang perlu diselesaikan secara bersama demi kepentingan bersama.

**PEMBERITAHUAN PERTANYAAN
DEWAN RAKYAT**

PERTANYAAN : BAGI JAWAB LISAN

**DARIPADA : DR. HAJI IZANI BIN HAJI HUSIN
[PENGKALAN CHEPA]**

TARIKH : 12 MAC 2014 (RABU)

SOALAN : 69

Dr. Haji Izani bin Haji Husin [Pengkalan Chepa] minta **MENTERI PENGANGKUTAN** menyatakan adakah Kementerian bercadang untuk memulakan pembesaran bangunan Terminal Lapangan Terbang Sultan Ismail Petra dalam masa terdekat.

JAWAPAN

Tuan Yang Di Pertua,

Untuk makluman Ahli Yang Berhormat Pengkalan Chepa, Lapangan Terbang Sultan Ismail Petra, Kota Bharu telahpun dinaiktaraf oleh Kerajaan pada 14 Jun 2010 yang meliputi pemanjangan landasan dari 1,981 meter kepada 2,400 meter, pembinaan laluan taksi yang baru, dan apron helikopter. Projek ini telah siap sepenuhnya pada 11 September 2011. Menyedari keperluan pembangunan masa depan lapangan terbang ini, Kementerian Pengangkutan pada 30 Jun 2013 telah mengemukakan permohonan berkaitan pembesaran bangunan terminal dan apron parkir di Lapangan Terbang Sultan Ismail Petra kepada Unit Perancang Ekonomi, Jabatan Perdana Menteri untuk dipertimbangkan dalam *Rolling Plan 4* (RP4, RMKe-10). Permohonan tersebut termasuk pembesaran dan menaiktaraf bangunan terminal bagi menampung 2.5 juta penumpang setahun dari 1.5 juta penumpang sedia ada. Kementerian berharap permohonan dapat diluluskan dalam Rancangan Malaysia Kesebelas (RMKe-11) yang akan datang bagi menampung kepesatan penumpang di Lapangan Terbang Sultan Ismail Petra.